

Tico Croes:

CUANTO MAS E PUEBLO TIN DI SOPORTA?

ORANJESTAD(AAN) E Parlamentario Tico Croes a declara na DIARIO cu seguramente e caso di Sr. Lozano ta un ehempel di loke e tabata kier meen cu e preguntanan cu el a haci siman pasa.

"Cu e ehempel aki ta resalta cu mi preguntanan no tabata preguntanan cu a sali for di cielo, pero simpelmente preguntanan cu ta basa riba un investigacion profundo y exhaustivo cu nos a haci durante basta luna riba e forma di e maneho di admision di stranheronan aki na Aruba.

"E preguntanan tabata relaciona cu sumanan astronomico cu ta worde cobra pa e oficina di abogado di Ministro Hendrik Croes, sumanan cu nos a bisa cu ta varia entre 3000 pa 5000 florin. Awe mi ta contento cu e caso di Sr. Lozano a bin padilanti na unda ta confirma cu den su caso, cu ta un compania Arubiano chikito, den su caso so a worde cobra pa honorario manera ta poni bon cla, di 5000 florin!

"Y si bo compara e 5000 florin cu tarifanan normal di abogadonan aki na Aruba, cu ta varia entre 300 y 700 florin pa un trabao mes of mas hopi cu esaki, bo por imaginabo kico ta e ganashi astronomico cu ta worde haci riba e asunto di peticion pa permiso di admision di stranhero na Aruba.

"Pakico nos ta cuestiona esaki? Pasobra den esaki nos ta kere cu tin ma uso di poder y tin practicanan cu ta intolerabel pa nos sistema democratico aki na Aruba.

"Y mas ainda, bo ta mira con ridiculo e reaccion di Ministro Hendrik Croes tabata siman pasa, ora cu aparentemente el a bisa cu ami lo a confundi peso cu florin. Awor mi kier puntra Ministro Hendrik Croes si Sr. Lozano lo por pague den peso? Of si ta den florin su oficina di abogado ta cobra?

"Pero banda di esey, pasobra loke e ta purba di haci ta hala un banda y bagatelisa e preguntanan cu mi a haci, banda di esaki e preocupacion y e peliger di mas grandi den henter e asunto tocante e maneho di admision ta cu nos ta compronde awor pakico Gobierno kier pa stranhero bin traha na Aruba!

"Nos ta compronde awor pakico Gabinete Oduber den forma sistematico ta purba di boycotia di tur manera e regreso di nos Arubianonan na Aruba. Pasobra nos Arubianonan na Hulanda no mester di un permiso di trabao pa bin traha na nan propio lugar na unda nan a nace y na unda nan tin famia. En cambio, stranheronan si mester di esaki y stranheronan masivamente, manera cu mi preguntanan a indica, ta acerca e oficina aki di Ministro Hendrik Croes, pa e oficina aki haci un permiso pa cual e oficina aki ta cobra sumanan grandi.

"Y e abuso den e caso di Sr. Lozano ta mas grandi ainda, pasobra no solamente nan ta cobre e suma astronomico aki, pero nan ta cobre pa algo cu e no a haya, pasobra e no a haya e permisonan aki y mas ainda, e abuso ta mas grandi pasobra ta resulta cu e personanan cu Sr. Lozano a pidi permiso pa nan ta trahando cerca un partner di e oficina di Ministro Hendrik Croes, manera den e declaracion di Sr. Lozano ta indica, na Spaans Lagoenweg.

"Esakinan ta cosnan cu nos ta rechaza energeticamente y mi ta kere cu akinan e gremionan na Aruba tambe mester huzga pa nan mes cuanto mas e pueblo di Aruba mester soporta, cuanto mas abuso, promer cu yega asina leu cu nan por kibra e complot di silencio cu nos ta den."